

DISSERTATIO INAVGVRALIS MEDICA  
DE

# OPHTHALMIA

QVAM

RECTORE MAGNIFICENTISSIMO

SERENISSIMO PRINCIPE AC DOMINO

DN. GVILIELMO HEINRICO

DVCE SAXONIAE, IVLIACI, CLIVIAE, MONTIVM, RELIQA

AVCTORITATE ET CONSENSV

GRATIOSISSIMAE FACVLTATIS MEDICAE

IN ALMA SALANA

SVB PRAESIDIO

HERM. FRIDER. TEICHMEYERI

PHIL. ET MED. DOCT. ANATOMIAE, CHIRVURGIAE ET BOTANICES P. P. O.

SERENISSIMORVM SAXONIAE DVCVM VINAR. ET ISENAC. CONSIL. AVL.

ET ARCHIATRI, ACAD. NATVR. CVRIOS. IMPERIAL. LEOPOLD.

CAROLINAE, ET REG. SOC. SCIENT. BORVSS. SOCI

ORDINIS MEDICOR. h. t. DECAN

PATRONI ET PRAECEPTORIS SVI PIE COLENDI

PRO LICENTIA

IMPETRANDI GRADVM DOCTORIS

SVMMOSQVE IN ARTE MEDICA HONORES ET PRIVILEGIA

PVBlico ERVDITORVM EXAMINI

SVBMITTIT

AVCTOR ET RESPONDENS

IOANNES SAMVEL PILLINGIVS

FRANCKENHVSANVS MISNICVS

---

AD DIEM AVGVST. MDCC XXXII.

HORIS ANTE-ET POMERIDIANIS.

---

IENAE, EX OFFICINA MVLLERIANA.



V I R O

PERILLVSTRI, GENEROSISSIMO ATQVE EXCELLENTISSIMO

D O M I N O

AVGVSTO DE GRIESHEIM

DYNASTÆ IN DRACKENDORFF, SERENISSIMO QVON-  
DAM DVCI SAXO-CIZENSI A CONSILII AVLICIS  
ET CAMERALIBVS

ET

V I R O

ILLVSTRI, EXCELLENTISSIMO AC EXPERIENTISSIMO

D O M I N O

HERMANNO FRIDERICO  
TEICHMEYERO

PHIL. ET MED. DOCT. ANAT. CHIRVRG. ET BOTAN. P. P. O.  
SERENISSIMOR. SAX. DVC. VINAR. ET ISENAC. CON-  
SILIAR. AVLIC. ET ARCHIATRO, ACAD. NAT. CVRIOS.  
IMPER. LEOPOLD. CAROL. ET REG. SOC. BORVSS. SO-  
CIO, GRATIOSÆ FACVLTAT. MED. h. t. DECANO  
SPECTATISSIMO

PATRONIS ET MODERATORIBVS

FORTVNÆ MEÆ BENIGNISSIMIS  
IN SVBMISSÆ ET GRATISSIMÆ MENTIS

TESSERAM

CVM VOTO ARDENTISSIMO

VT

DEVS O. M. OMNIA IN ME COLLATA BENEFICIA  
OMNI GENERE FELICITATVM COMPENSARE

VELIT

D. D. D.

AVCTOR.





I. N. D.

## PROOEMIUM.



Oculus noster, machina illa optica, per artem inimitabilis, ab adorando divino Numine admirando modo constructa, & in suprema corporis parte posita, ut arctissimum commercium cum cerebro, animæ rationalis sede, habeat, & omnia, quæ obveniunt, observare possit, post lapsum proh dolor! præ reliquis corporis partibus multis afficitur morbis. Si enim omnes partes oeconomiae nostræ animalis percurramus, nulla tot diversisque vexatur malis, quam oculus, quæ vel imbecillitatem, vel plenariam visus abolitionem præstant. Confirmat & quotidiana experientia hoc assertum, & celeberrimi Medici practici, uti Illustris, & nunquam satis & pro dignitate laudandus Dn. Consiliarius aulicus, FRIDERICVS HOFFMANNVS, in Dissertatio-



ne de *Morbis oculorum precipuis, & recta eorum medendi ratione*, Respondente Redeckero Halæ habita 1728. quique ex instituto de morbis oculorum scripserunt, Dn. CARL DE SAINT TVES, Dn. ANTOINE MAITRE- IAN, Chirurgi Gallici exercitatisimi, in suis scriptis, luculenter ob oculos ponunt. In morborum oculi numero nullus frequentior observatur *ophthalmia*, quippe quæ vel aliorum oculi morborum mater, vel focia deprehenditur. Inter innumera beneficia ab Illustri Dominio PRAESIDE, per totum ferme academica vitæ meæ cursum, in me collata, gratisimo animo etiam illud refero, quod benignissime concesserit, ægrotos visitare, methodum medendi illius observare, manusque interdum admove. Cumque sæpe numero oculorum morbi occurreriat, quorum nonnulla exempla in Disputatione adduxi, elegi doctrinam de *Ophthalmia*, ut illam specimis inauguralis loco traderem. Cui labori ut Deus optimus maximus clementi sua gratia adesse velit, devota & submissa eum imploro mente, quo omnia feliciter succedant.

## Th. I.

**O**phthalmia est inflammatio oculi, ejusque tunicae adnatæ, imo reliquarum tunicarum, humorum, musculorum, palpebrarum & glandularum, dependens a sangvine, in hisce partibus statim concipiente, & calorem, ruborem, tumorem, dolorem & supurationem producente.

## Th. II.

Subjectum hujus inflammationis constituunt ipsæ partes affectæ, quæ in definitione allegatæ sunt. Nempe



pe I.) *Tunicæ*. Hæ ab Anatomicis dividuntur a.) in *adnatam*, five *albugineam*, aut *conjunctivam*, quæ est continuatio pericranii, conjungit oculum cum orbita & palpebris, albumque sic dictum oculi constituit. Copiosissimis repleta est vasculis sangviferis, quæ etiam in nonnullorum oculis, statu sano præsentē, clare videri, & distinctæ observari possunt. b.) *Tendineam*, quæ oritur a tendinibus musculorum, bulbum oculi moventium. c.) *Corneam*, quæ est tunica pellucida, convexa, & in varias laminas divisibilis, ex vasculis nevrolymphaticis pellucidis constans. d.) *Scleroticam*. Hæc est tunica satis valida, a dura matre orta, nervum opticum undique cingens, in qua reperiuntur fontes *Hovii*, olim ductus aquosi *Nuckii* dicti. A parte postica opaca deprehenditur, a parte vero anteriori corneam pellucidam tunicam constituit. e.) *Choroideam*. Est hæc tunica supra scleroticam sita, multisque vasculis sangviferis repleta, & nigro calore imbuta. f.) *Vasculosam Ruyschianam*, quæ lamellam interiorem tunicæ choroideæ, vasculis copiosis sanguiferis refertam, constituit. g.) *Lucidam Hannemannianam*, quæ in nonnullorum hominum & animalium oculis reperitur, & in tenebris lucet. h.) *Vveam*, quæ ex variis vasorum & fibrarum motricium ordinibus componitur. In hujus medio apparet foramen, pupilla dicta, quod dilatari & constringi potest, cum iride & ligamento ciliari. i.) *Hyaloideam*, quæ est tunica exterior, reliquas humoris vitrei includens tunicas. k.) *Arachnoideam*, quæ est tunica subtilis, manifeste extus crystallinum circumdans humorem. l.) *Retinam*, quæ est tunica quasi mucosa, & nihil aliud, quam ipse nervus opticus ex-



panfus. II.) *Humores*. Quid humores oculorum sint, disputant Anatomiei. Secundum Hovianam sententiam humor vitreus & crystallinus componuntur ex variis tunicis atque lamellis. Lamellæ vero ipsæ nihil aliud constituunt, quam congeriem vasorum neuro-lymphaticorum subtilissimorum & pellucidorum, in quibus fluidum subtilissimum atque pellucidum constanter movetur. Celeberrimus, & nunquam sine veneratione laudandus HEISTERVS, in suo *Compendio anatomico*, pag. 284. quidem putat, quod HOVIUS excogitaverit novum nomen vasorum neuro-lymphaticorum. Sed HOVIUS auctor non est. Hæc vasa enim nova detecta sunt ab incomparabili Monspeliensium Medico, RATMVNDO VIEVSSENIO, in suo *Novo vasorum corporis humani Systemate*, edito Amstelædami 1705. Qui fere ubique de lymphatico-nerveis vasculis loquitur. HOVIUS vero Tractatus de *Circulari motu humorum in oculis*, cum apologetica epistola ad celeberrimum RVTSCHIVM, prodiit Lugduni Batavorum 1716. Hæc vasa subtilissima pellucida ab inflammatione sane non sunt immunia, quoniam cohærent cum arteriolis minimis, quorum productiones sunt. Et si chylositas hæc vascula intrare potest, eorumque pelluciditatem obscurare; credibile quoque est, quod in hisce vasculis, inprimis circa origines eorum, fieri possint inflammationes. Et quod actuantur horum organorum inflammationes & suppurationes, exinde concludere licet, 1.) quia datur ophthalmia ferina, in qua tota oculi substantia inflammata, suppuratur. 2.) Quoniam in cornea tunica inflammationes & suppurationes evidenter contingunt, quod pus, in cornea collectum, dum effluit, sinum & cavitatem in

cor-



cornea relinquit, id quod in praxi Illust. Dn. PRAESID. aliquoties manifeste observavi. Cum itaque cornea pellucida haud secus ac ipsi humores, vitreus nempe & crystallinus, composita sit ex vasculis nevro-lymphaticis, dubium non est, quin in humoribus, eorumque vasculis pellucidis, similis fieri possit inflammatio & suppuratio. Confirmat hoc assertum Celeberrimum Academiae Lugd. Batavorum decus, BOERHAAVIUS, in *Institutionibus medicis*, pag. m. 392. §. 842. ubi inquit: *Verum etiam sit, ut lens crystallina opaca, inflammata, suppurata, hydropica, corrupta, atrophica facta producat glaucoma, cataractam, visum hebetem, caecitatem opacam ἀμβλυωπίαν, &c.* Cæterum ea vasa, quæ a VIEVSSENIO lymphatico-nervea, & ab HOVIO nevro-lymphatica nominantur, a RVTSCHIO arteriæ serosæ, vel lymphaticæ, appellantur.

III.) *Musculi*, bulbum oculi commoventes, quorum sex numerantur; attollens nempe, depressens, adducens, abducens, obliquus superior, qui cum supra trochleam cartilaginosa moveatur, trochlearis appellatur, & obliquus inferior. IV.) *Palpebra*, superior nempe & inferior, sunt organa membranacea, vasculosa, musculosa, bulbum oculi munientia, in harum interna superficie reperiuntur *vasa Meibomiana*, & ductus, quibus mediantibus lacrymæ, in glandula innominata secretæ, derivantur ad interstitia bulbi & palpebrarum. Musculi palpebrarum, secundum Celeberrimos ANATOMICOS, SANTORINUM, in *Observationibus anatomicis*, & VALTHERUM, in *Anatomia repetita*, sunt septem; sex nempe orbiculares, & unus, palpebram superiorem attollens. Ad orbiculares referuntur suprafrontales, superior, & inferior, duo semicirculares inferiores, duo pal-



palpebrarum proprii, sive clausores, & denique musculus palpebrarum internus, in orbitam oculi currens, palpebramque aperiens, sive attollens, V.) *Glandula* sunt duæ; nempe innominata conglomerata, in superiori orbitæ parte sita, & minor, in angulo domestico conspicua, quæ humorem illum, bulbum oculi lubricantem, quemque, si tanta in copia secretus, ut fiat conspicuus, lacrymas vocamus, secernunt. Deprehenduntur etiam circa limbum cartilagosum glandulæ ciliares, ab inventore Meibomianæ, (vid. ejus *Epistolam ad Langellottum de Vasis palpebrarum novis. Helmstadii. 1664.*) a Celeberrimo Anatomico, MORGAGNI (qui jam citatam epistolam, ob raritatem, impetrare non potuit, uti ipse fatetur,) sebaceæ vocatæ, & ab hoc expositæ & delineatæ in *Adversariis anatomicis*, Adversar. I. pag. 9. Tab. IV. fig. l. c. d. quæ humore suo margines inungunt, quique humor conglutinat palpebras in morbis oculorum. De hisce glandulis ita Celeberrimus BOERHAAVIVS, in *Institutionibus medic.* pag. 233. §. 511. loquitur: *Ne autem collisu assiduo nictantes palpebre exorientur, in limbo cartilaginoso utriusque glandule granulosa, subflava, humorem quasi ex adipe & cera mistis conficientes, & osculis apertis eructantes, hoc ipso margines inungentes, adsunt; sunt hæc oscula fines canaliculorum, serpentino reptatu hic locatorum, qui oriuntur continuati cum arteriis, hic distributis, absque fabrica glandulosa.* His merito glandulas minimas in interna palpebrarum superficie sitas, annumeramus. Quæ an glandulæ veræ sint, an spuria? hic non dijudicabimus. Sufficit, quod praxis medica eorum existentiam ad oculum ostendat. Etenim in his organis inflammationes & suppurationes, sive pustulæ, generantur.

Th. III.



## Th. III.

Omnes hæ partes simul inflammationem subire possunt, quia vasa sanguifera communia habent, & insuper nexus est glandularum cum palpebris, palpebrarum cum tunica adnata, hujus cum reliquis tunicis, humoribus, musculis, & nervo ipso optico. Inflammata itaque aliqua harum partium area, reliquæ facile per consensum eodem malo affici possunt & solent. Præprimis autem inflammatur tunica adnata, quæ primaria sedes ophthalmiæ est, quia, cum alba sit, vasa sanguifera, particulariter fortassis conformata, possidet, quæ modo recipiunt globulos sanguinis minimos, qui, secundum sententiam Levvenhoekii, albicantes sunt. Præterea hæ tunica præ reliquis aeri liberiori est exposita. Ideo in hoc loco facile humorum coagulatio & stagnatio, vasorum constrictio & coarctatio contingit. Adest etiam lacrymalis humor, qui si acris, vim suam hic exercet, & læsiones externæ noxam huic tunicæ insuper facile inferunt.

## Th. IV.

Desertur sanguis ad oculi partes internas per caroticam arteriam internam, quæ cerebrum ingressa, duobus ramulis cingit nervum opticum, constituentibus simul *systema Hovianum*, & ejus *rete*, quod delineatum extat in Tab. I. ejus Tractat. Hoc quoque in theatro publico anatomico egregie demonstravit Ill. DN. PRAESES. Ex his arteriis in interna oculi parte exeunt & originem ducunt vasa illa, nevrolymphatica dicta, quæ nutriunt & constituunt humorem aqueum, vitreum & crystallinum. Externæ partes accipiunt sanguinem ab arteria carotica externa. San-



guis autem revehitur a venis jugularibus, tam internis, quam externis, ad venam cavam, ab hac ad cor. Ad sunt etiam copiosi nervi; ut optici, oculorum motorii, pathetici & timidi, partim pro visu, partim etiam pro motu oculi & faciei destinati, quo pertinet *pes anserinus*, sive distributio illa nervorum, ab oculo ad malas tendentium. Vide EVSTACHII Tab. anat. 19. ideo non mirum quod a levissima causa hic sensatio tristis observetur.

#### Th. V.

Inflammatiō autem fit in vasculis arteriosis minimis dictarum partium, ubi si stasis concepit sanguis, calorem, ruborem, dolorem, tumorem, & tandem, si non resolvitur & discutitur, suppurationem producit. Hæc autem omnia majori gradu adsunt, si sanguis copiosis repletus est particulis, biliosis dictis, hoc est, salinis sulphureisque, in se invicem agentibus. Quod si autem talis conditio sanguinis non adsit, & tamen contingat inflammatio quædam vel a sero viscido, acido & acri, vel a læsionibus, externe factis, tunc sequitur inflammatio in minori & mitiori gradu.

#### Th. VI.

Stagnante sanguine, præsertim activiori, evolvuntur particulæ salinæ, lympa subtilis, has alias temperans & includens; secedit, unde salinæ illæ agunt in partes sulphureas, ideoque fit quasi fermentificus motus, a quo calor iste præternaturalis producitur. Sanguis, in fluxu impeditus, novo tamen semper, vi cordis & arteriarum, appulso, necessario alia, & majora quærit spatia. Distendit ideo vasa, imprimis in tunica albuginea, ut etiam in apri- cum veniant ea, quæ alias ibi non erant conspicua.

Pro-



Propellitur quoque in illa vasa nevrolymphatica, lymphatico-nervea, arteriæ serosæ, vel lymphaticæ, dicta, quæ antea non sangvinem, sed pellucidam vehebant lympham. Ideo in his partibus albicantibus & pellucidis *rubedo* apparet. Cum sanguis accumuletur in vasculis, fibræ illorum distenduntur & elevantur, *tumor* necessario confurgit. Majori vi & cum impetu expansione & distensione fibrarum, vasa & tunicas formantium, facta, ad rupturam inclinant fibræ, tristem sensationem, sive *dolorem*, causant. Quem etiam producunt & augent aculei salini, in fibras, pungendo, rodendo, &c. libere agentes. Sanguis collectus, stagnans, resolutus, corruptus, calore & quiete putrescit leviter, mutatur in materiam purulentam: Quæ si non educitur, fiunt tumores in glandulis duri, indolentes, scirrhii vocati; aut fit acrior, ichorosa, rodens, solida destruens, haud raro gangrænam inducens.

## Th. VII.

Causa immediata, sive proxima, inter quam & morbum ipsum nulla alia intercedit, hujus inflammationis est *stasis sanguinis*. Hæc autem producitur a causa mediata proximiori, nempe vel vitio humorum, tum sanguinis, tum seri, vel culpa viarum, vel vasorum, humores in se continentium.

## Th. VIII.

Culpa sanguinis ipsius hoc fit, 1.) si intemperie, uti vocant, calida, vel biliosa, laborat, resolutus rarefactusque, majori præsertim in copia, defertur ad vasa, supra allegata, expandit & distendit nimis vascula: Amittunt ideo vim, quam alias exercere poterant in fluida, ea propellendo, quo facto, sanguis, a tergo



sequens & accedens novus, transitum liberum invenire nequit, quare statim suscipit, & inflammationem producit. 2.) Si sanguis nimis crassus & viscosus est, ita, ut particulae, illum constituentes, majorem habeant cohesionem inter se, & globulus, per vasa transiens, non respondeat horum capacitati, necessario sequitur obstructio, & evolutis particulis salino-sulphureis, inflammatio. 3.) Si sanguis acris sit, aciculi salini agunt in fibras, & contractionem vasorum promoveant, qua praesente sanguis progredi non potest. Ergo subsistit, & inflammationibus ansam praebet.

### Th. IX.

Seri vitio hoc malum fieri solet, 1.) si in genere nimis viscosum est, debitamque fluxilitatem sanguini non conciliat, sed potius ad coagula & statim disponit. Secreta autem hujus seri pars a glandulis lacrymalibus, minus fluxilis, a poris lacrymalibus commode absorberi non potest, colligitur inter palpebras & bulbum, premit vasa sangvifera, circulumque liberum sanguinis turbat. 2.) Si nimiam possidet acrimoniam, agit irritando, stimulando fibras vasorum, contractionem horum promovet, obstructionem inducit, & symbolum suum ad promovendas inflammationes praebet. Nec excludendae sunt lacrymae nimis acres, quod confirmat Celeberrimus D. D. SCHREIBERVS in *Meditat. Philosophico. Med. de Lacrumis & Fletu*. Lipsi. 1729. p. 35. §. 123. *A lacrumis exacerbescentibus erosiones inflammatoriae. Acre quodcunque, vasi impactum, illud stimulando inflammatur. Idem fiet a lacrumarum acrimonia, quae sensibilissimas palpebras, aliaque loca, mox igne suffundunt.*

### Th. X.



## Th. X.

Viarum culpa obstructio, & subsequens inflammatio fit 1.) si vasa sunt nimis angustata, rigida & compressa, ut liquidum transiens libere permeare non possit. 2.) Si nimis debiles sunt, debitumque tonum naturalem non possident, uno verbo, si atonia laborant, humores, præsertim magna vi huc appulso, propellere non possunt. Contingit ideo stasis. Lympha tamen, sanguine subtilior, secessum facit, salia remanent, agunt in particulas sulphureas quæ easque evolvunt, & sic inflammationem præstant.

## Th. XI.

Læsiones externæ obstructions & inflammationes causant, ad quas referri possunt 1.) acria, oculi partibus applicata; liquores, acrioribus salinis imprægnati particulis. 2.) Pulveres salini, vitriolici, aluminosi, calcis vivæ, cinerum, &c. 3.) Frustula metallica, vitri, arenæ, & aliorum corporum, quæ agunt morficando, adstringendo, coagulando, pungendo, premendo, ophthalmiam facile produciunt, vel jam præsentem augent.

## Th. XII.

Vulneribus, his partibus inflictis, subvenire solet inflammatio. Divisa enim & dilacerata vascula sanguifera contrahuntur. Sanguis quidem adfluit, sed refluxere non potest. Cumulatur itaque, & stasis concipit sanguis, inflammationem post se trahit, mutatur in purulentam materiam, nisi ejusdem fiat decens resolutio.

## Th. XIII.

Contusiones prægressæ dictum malum inferunt,



quatenus fit extravasatio, & stasis sanguinis. Quales graviores contusiones tum palpebrarum, tum tunicae adnatæ ipsius, & corneæ, in certamine digladiatorio inductas, cum subsecutis inflammationibus, aliquoties vidi, & illis medelam adhibere occasione[m] habui.

Th. XIV. *billog. n. n. n. n.*

Causæ mediatae remotiores sunt, quæ, præsentē jam dispositione in partibus allegatis, stasi & inflammationi ansam præbent, insimulque præsentī ophthalmiæ incrementum & augmentum suppeditant. Sunt autem hæc vel naturales, vel nonnaturales, vel præternaturales.

Th. XV.

Ex naturalibus rebus sunt 1.) *temperamentum biliosum*, ubi particulae salino-sulphureæ prædominantes, efficiunt ophthalmiam veram. Pituitosum, ob serum viscidum, lentum, ophthalmiam serosam, sive spuriam dictam, producit. Nequaquam vero alia temperamenta sunt excludenda, quia accedente notabili causa etiam hoc malo vexantur. 2.) *Aetas vegeta*, cum in hac plethoræque particulae salino-sulphureæ emineant, & serosæ temperantes deficient, ob quas conditiones ad febres disposita, facile huic malo est obnoxia. *Minor aetas* ophthalmiis subjecta est, quia semper copiosum serum conjunctum habet, quod autem facile intemperatum redditur, si nutrix non sit bonæ constitutionis, vel si diætæ regulæ, ut sæpe fieri solet, non observentur, vel si variolæ hunc morbum relinquunt, unde frequentes ophthalmiæ in infantibus & pueris observantur. Cum in *senibus* humores fiant crassiores, spissiores, & aciores, vasa solidescant & rigida fiant, ob has conditiones proclives sunt ad ophthalmiam spuriam, & lippitudi-



tudinem. 3.) *Sexus uterque* hoc morbo affligitur. Quia autem sequior frequenter, & levisima data causa atque occasione, lacrymas fundit, ideo partim a frictione constanti, & abstersione facta, majori in copia separantur lacrymæ, quam puncta lacrymalia absorbere, & ad nares ducere valent, partim quoque ab irritatione malum hoc invitatur. 4.) *Dispositio hereditaria* etiam in causa est, quia morbi, in viscido & acri hærentes, facile communicantur tenellis foetus staminibus, & ophthalmia affecti parentes eam, in liberos propagant, nisi propria dispositio in liberis resistat, aut alia per medicamenta procuretur.

## Th. XVI.

Ex nonnaturalibus hoc malum proferre, & producto majora præbere incrementa possunt 1.) *aer nimis fervidus & æstuans*, ut in toto corpore serum diffiat, ita & in oculo humidum dissipat, lacrymæ fiunt acriores & spissiores, oculus non blande lubricatur & humectatur, sed potius obstructio & inflammatio producit. *Aer nimis frigidus* constringit fibras solidas vasorum, & transitum humorum impedit, coagulat quoque humores, & obstructionem atque inflammationem efficit. Si *aer nimis humidus sit*, quia secessus partium ferrosarum superfluarum commode fieri non potest, relinquantur in corpore, & occasionem præbent ophthalmiis spuriiis. Maximum autem damnum infert *aer inequalis*, id est, subita ejusdem mutatio, vel ex frigido in calidum, vel ex calido in frigidum. In aëre frigido humores magis sunt spissi, accedente calore præsertim vehementiori, & uno quasi impetu resolvuntur, subtiliores secedunt & excernuntur, crassiores autem & acriores hu-



humorum partes in corpore remanent. In aere calidiorē massa sanguinea magis est resoluta, fiuntque copiosæ se- & excretionēs, subito accedente frigore, subsistunt particulæ secernendæ. Contingunt ideo ex duplici mutatione subitanea obstructiones & inflammationes. *Aere ventoso, nebulofo, variis nocivis exhalationibus, fumisque acrioribus repleto, existente*, corpora peregrina, tunicis, & partibus nervosis his ingrata, adducuntur, ubi partim a vehementi commotione, partim a frictione & irritatione ophthalmiæ producuntur. Omnia *alimenta*, etiam alias bonæ notæ, nimia tamen assumpta copia, quam ut digeri, dilui & resolvi possint, laudabilem chylum, & temperatum sanguinem non præbent. Eoque magis hoc fiet, si sint nimis acria, viscositate pollentia, vel in aere siccata, vel in fumo indurata, minus resolubilia. Vt & cibi, copioso sale volatili alcalico repleti, ut allium, cepæ, porrum, raphanus rusticanus, &c. facile in dispositis hunc morbum præstant. In juvene, qui per tempus aliquod victu calidiorē, inprimis carne bubula, cepis, vel raphano marino, vel aromatibus, condita, delectatus, insuperque biberat vinum, satis generosum, observavit ophthalmiam, & totum casum communicavit Celeberrimus Profess. & Practicus Lipsiensis, D. D. MICHAELIS, in *Operibus Medico-Chirurgicis*, pag. m. 413. & seq. *Potus nimis spirituosus, copiose assumptus*, non temperat massam sanguineam, sed auget acrimoniam, &, diffundendo serum, viscosam illam reddit. Si potus sufficiens deficit, humores fiunt acriores, & crassiores. *Motus corporis nimius*, exagitans nimis massam sanguineam, separat nimis serum, quod si non restituitur, *salia explicantur*, &, a defectu seris, spissitudo relinquitur.



tur. *Defectus motus*, se- & excretiones impediendo, intemperatam reddit massam sanguineam. Huc pertinet quoque somnus nimius. *Vigilia nimia* & excedentes debilitant & depauperant spiritus animales, lymphæ secessum, & activitatem salium producant. *Animi perturbata*, aut nimium expandendo & commovendo, aut concentrando & coagulando, motus humorum in oculis invertunt. Cum vita & sanitas nostra inter alia consistat in se- & excretionibus, rite institutis, facile dijudicari potest, quantum damnum consurgat, si illæ non debito & legitimo modo absolvantur. *Transpiratione insensibili impedita*, remanent partes acriores, fit intemperies, ab hac variæ obstructiones & inflammationes, quod etiam de aliis evacuationibus, solennibus hæmorrhoidum, mensium, &c. valet. Huc quoque spectant excretiones nimix, quæ, secessu nimio spirituum, & feri blandi, intemperatam relinquunt massam sanguineam. De venere immodica hoc malum quosdam annotasse, nec experientiam deesse, confirmat Illust. nunc B. WEDELIVS, in Dissertat. de *Opthalmia*, pag. 10. §. 18.

## Th. XVII.

Ex præternaturalibus rebus omnes morbi ab intemperie sanguinis calida biliosa, acri, ut omnes febres acutæ, malignæ, erysipelas, dysenteria, &c. vel etiam illi morbi, ubi viscositas, & acrimonia deprehenditur, materiam opthalmiis suppeditant. Inprimis *scorbutus* hoc malum fovet & alit, quia in scorbuto semper principium salinum, lympham reddens putrilaginosam, præsens est, & cum totam massam humorum inquinet, opthalmiæ frequentes in scorbutu-



buticis observantur. Vidimus nuper in subjecto quodam scorbutico ophthalmiam graviolem. Ambo oculi erant hoc malo affecti. Tota albuginea, & tota ferme cornea erant rubra, & sanguine repleta. In cornea circa marginem, & albuginea, erant tubercula, & ulcuscula quaedam, lumenque perferre non poterat xger. Adhibitis autem debitis medicaminibus, Deo auxiliante, restitutus est. *Lues venerea*, cum in hac viscidum, cui acidum, magis, vel minus rosivum, immersum, secundum Illustrem, & Facultatis medicæ summe venerabilem Seniore, IOANNEM ADOLPHUM WEDELIVM, in Dissertatione de *Lue venerea*, pag. 4. §. 2. deprehenditur, conjunctam sæpe numero habet ophthalmiam. Excitantur enim a vehemēti venerea malignitate hinc inde in partibus obstructions, & inflammationes. Ideo non mirum, quod etiam oculus ejusmodi labem contrahat. Datur quoque agilops, & fistula lacrymalis venerea, quos morbos vidit plus vice simplici Illust. Dn. PRAESES, & aliquoties in morbis venereis, gonorrhœa graviore, tumore, & inflammatione testium, variola magna, &c. observavi ophthalmiam, quæ tamen extincta venerea malignitate, & adhibitis debitis medicamentis externis, feliciter sublata quoque est. In *variolis* malignitas, hunc morbum efficiens, desertur ad tunicam albugineam, & corneam, ibique excitantur variolæ, quæ sæpe totam tunicam inflammant. Præterea in variolis humor viscidus, a glandulis secretus, palpebras occludit, ut sponte aperiri oculus non possit, qui humor stagnans corrumpitur, acrimonia vellicat, & inflamat. In *affectibus catarrhalibus*, coryza, &c. materia acris secernitur in tunica



nica narium pituitaria, & tunica glandulosa asperæ arteriæ, quod si etiam in glandulis lacrymalibus contingat, oculus non blande lubricatur, ideo acrimonia stric-  
turam tunicarum, & palpebrarum, insimulque inflam-  
mationem excitat. Tussis gravior, & vomitus crebrior,  
vehementiorque, magna vi sanguinem versus caput, &  
ad oculos premunt, ubi in vasculis subtilissimis facile  
subsistit. *Erysipelas faciei* cum sit morbus inflammato-  
rius per consensum, sæpe afficit oculum. Id quod nu-  
per observavimus: Quidam enim laborabat erysipela-  
te faciei, tota fere facies erat cum naso inprimis tumef-  
facta, & inflammata, una cum palpebris, & tunica ad-  
nata. Aderat febris, dolor capitis, somnus, per aliquot  
dies denegatus, appetitusque prostratus. In usum  
vocatis debitis medicamentis, & sudore, & hæmorrha-  
gia narium critica supervenientibus, Dei auxilio, per-  
fecte convaluit æger, separata in tota facie cuticula. *A dy-*  
*senteria* propemodum fatalem observavit ophthalmi-  
am Ill. & B. WEDELIVS. Vid. l. c. p. 12. Per *contagium*  
hoc malum propagatur, si gravis adsit acrimonia, &  
effluvia ex oculis affectis calide in conversatione de-  
riventur in oculos sanos, ut eodem modo inflam-  
mentur.

## Th. XVIII.

Ophthalmia dividitur 1. ratione loci in *inter-*  
*nam* & *externam*. In *externa* palpebræ, glandulæ, tu-  
nica adnata, & cornea, vel conjunctim, vel separatim,  
inflammantur. In *interna* inflammationem subeunt  
internæ oculi partes, ut tunicæ, muscoli, & humores.  
2.) Ophthalmia est vel *vera*, sive *exquisita*, vel *spuria*,  
sive *notba*. In vera requisita veræ inflammationis ad-

sunt a sanguinis intemperie, magis activioris. In spuria, sive notha, tantummodo aliquis rubor, dolor, & pruritus percipitur. Serosa etiam vocatur, ob serum acre, copiose in glandulis lacrymalibus secretum, & exstillans. Appellatur quoque *Epiphora*, sive lippitudo. Vid. THEODOR. ZWINGERI *Theatr. Prax. med.* Basil. 1710. edit. pag. 281. *Epiphora*, secundum Ill. HOFFMANNVM, l. c. pag. 10. est perpetua salsa & acris aqua effluxio, ita tamen, ut plerumque pruritus, & dolor molestus, cum oculorum, & palpebrarum tumore, gravius agrum detineat, quando vero effluens humor, acrimonia eminenti destitutus, oculum nec dolore, nec rubore afficiat, sed tantum illacrymatione molestus sit, adeoque mitiorem faciat lippitudinem. Ab interceptio sanguinis per glandulas in venas regressu originem duxit. 3.) Ratione gradus est α.) *ταραξια* levisissima inflammatio oculi, cum rubore, calore, & dolore, a causa quadam externa, cum affluxu lymphæ. β.) *Ophthalmia*, proprie sic dicta, ubi calor, rubor, dolor, tumor & suppurandi potentia deprehenditur. Hæc est vel humida, si lacrymæ copiose effluunt, vel sicca, quando bulbus siccus est. γ.) *χημοσις*, si talis facta inflammatio, ut tumor tunicæ adnatæ supra corneam emineat, palpebræque quasi inversæ vix claudi possunt. δ.) *Ophthalmia ferina*, quæ est gravissimus gradus, ubi plerumque dolor capitis, & omnia symptomata majori & graviori gradu adsunt. Dependet interdum ab inflammatione, in cerebro nata. Si centraliter, totusque bulbus est inflammatus, fit suppuratio, & oculus perit. Si ab hac inflammatione per consensum afficiuntur tunicæ cerebri, fit phrenitis, ut plurimum, lethali cum eventu. Conf. B. WEDBLIVS, in



*Exercit. Semiot. patbol.* pag. 42. & *Disput. alleg.* §. 24. ETTMULLERVS, *Tom. II. Part. I. p. 588.* & seq. & Mr. ANTOINE, *Tr. von Augen-Krankheiten*, ex lingua Gallica in nostram translatum a D. Timme, *Brem. 1731. pag. 332. Cap. 12.* Illustris HOFFMANVS, in *Dissert. supra citata*, pag. 7. §. II. dividit ophthalmiam in leviolem, graviolem, & gravissimam. Levior tantum tunica adnatæ insidet. Gravior, præter adnatam, palpebras, totumque oculum exquisito dolore & ardore afficit. Gravissima ophthalmia est, quæ profundior ad ima oculi, & interiores tunicas, penetrat.

## Th. XIX.

Signa diagnostica facile demonstrant hunc affectum. Adest enim rubor, calor, tumor, dolor, qui variant pro gradu inflammationis. Visus est debilitatus, radiosque luminis sæpe vix perferre potest oculus affectus. In ferina interdum adnata, & cornea protuberant, oculus est rigidus, & vix moveri potest, ob mufculos, & bulbum, simul affectos, interdum, si ab inflammatione meningum dependet, externe nil in oculo conspicitur. Quando sanguis est effusus in vasa nervo-lymphatica, vel ex dilaceratis vasculis effluxit in humores, tunc objecta videntur rubra.

## Th. XX.

Prognosis variatur 1) ratione vite & mortis. Vbi notandum, quod inflammatio si externa sit, & resolutio impetrari possit, mortem non inferat. Gravior autem si expediri non possit, & suppuratio subsequatur, oculus destruitur. In ferina, gangræna accedente, non solum oculus perit, sed æger etiam vitam cum morte commutat. Notha adeo periculosa plerumque

non est, interim tamen chronica, & recurrens fieri solet, nisi causa perfecte sublata sit. Quo major & gravior læsio externa induxit ophthalmiam, eo magis, vel minus, malum erit curandum, visusque conservandus. 2. *Temporis eventus*. Leviori præsentè inflammationis gradu citior fit restitutio. Gravissimus, propter centralem inflammationem, & conjunctam gangranam, celeriter mortem inducit. 3. ) *Medii eventus* est vel ad salutem, vel ad mortem. Unica salus hic consistit in resolutione & discussione humorum, hic stagnantium. Suppuratio, quantum possibile, est declinanda. Nam, si major, destructio oculi metueda. Levior quidem & superficialis pustularum in tunicis externis, palpebris, & glandulis, facta suppuratio non adeo periculosa: Interim tamen præstat, cito materiam educere, & ulteriorem impedire suppurationem. Si autem hoc fieri nequit, saltem partes adjacentes probe defendendæ.

## Th. XXI.

Curatio ophthalmiæ ita instituenda, ut stasis sanguinis expediatur. Hoc fit 1. ) si sanguis adsit majori in copia, cum ebullitione, febre, reliquisque symptomatibus gravioribus, institui potest venæ sectio, eoque magis illam administrare possumus, si aliæ viæ, per quas sanguis ordinarium effluxum habere debet, sunt obstructæ. Vires autem semper attendendæ sunt. Ideo præstat statim in principio venam secare, vel in brachio, vel in pede. In grandiori & profundiori inflammatione, ubi periculum est, ne interiora in suppurationem transeant, præterea corpus juvenile, & sanguineum, malumque forte ab externa violentia inductum,



e re est, ut venæ sectio repetita celebretur, aut larga manu subtrahatur sanguis, & hoc quidem omnium optime per sectam jugularem. Quo certe in revellendis a capite sanguine, aliisque humoribus, nihil esse efficacius, adduxit Ill. HOFFMANNVS, l. c. p. 9. §. V. Adhiberi etiam possunt cucurbitulæ scarificatæ circa aures, in brachio, & dorso, serum autem peccans educendum per vesicatoria, in nucha, vel pone aures applicata, immo fonticuli, & setacea in usum vocanda. Huc pertinet scarificatio oculorum, de qua vid. erudit. Dissert. Celebrissimi Dn. Prof. Lips. PLATNERI 1728. habet: Ophthalmiam diuturnam a crusta lactea, illitu oleo amygdalorum dulci, cum flore lactis mixto, retropulsa fonticulum denique nulla re juvante cum effectu curasse, exhibet Celeberrimus Medicus Practicus, LENTILIUS, in *Eteodromo Medico-Practico* anni 1709. pag. 659. Sanguis, & serum, acrimonia & viscositate peccans, in culpa si est, commendant se 1) *diaphoretica* blanda, & *bezoardica* mitiora, quæ resolvunt, per insensibilem transpirationem separant, & vi sua balsamica putredini resistunt. Talia sunt Tinctura bezoardica essent. B. Wedelii, aliorumque, Ess. alexiphar. Stahlî, serpentar. virgin. & balsamic. Dn. Præs. basamiæ. Slevogt. myrrh. succin. lignorum, liquores anodynî minerales. Celeberrimus SENNERTVS in curatione pestilentiaë laudat spiritum vitrioli. Verba ejus, pag. 471. ita se habent: *Inprimis vero commendatur spiritus vitrioli, qui insignem vim habet putredini resistendi, obstructions aperiendi, febresque extinguendi.* Sed ista certe de liquore anodyno minerali, Naphta Chemicorum dicta, affirmari possunt. Nam in hoc liquore acidum corrosivum, facile nocivum, separatum est, & tantummodo partes subtiliores spirituq-

ſæ mercuriales ſulphureæ inibi deprehenduntur, quæ dicta efficiunt. Pulveres bezoardici, uti ſunt Anglicanus, Sennerti, Wedelii major & minor, Dn. Præſid. antimonium diaphoret. bezoardic mineral. rite præparatum, C. C. Ebur philoſoph. ppt. corall. rubr. & alb. perl. mater perlar. lap. canceror. teſt. ovar. unicorn. verum, mandib. luc. piſcis, ſuccinum, pulveres epileptici, ut Marchion. ſpecificum cephalic. Michael. quibus calore præſente addi debent nitrata, ut nitrum depuratum, antimoniatum, & ſulphuratum. 2.) *Aperientia, abſorbentia & evacuantia.* Aperiunt optime commendata bezoardica, hiſque adjungenda martialia, ut Tinctura martis temperata Wed. cydoniat. pomat. aperitiva Zvvelfſer. arcan. tartar. verum, Tinctura tartari, antimonii alcalica & tartariſata, Eſſent. ſalut. Dn. Præſid. baſſam. copaiv. ocul. populi, Magnesia rubra metallica, croci martis aperitivi, antimon. martial. cachect. Salia media, tartar. vitriolat. tartariſat. cryſtal. & cremor tartar. & fixa, ex herbis per incinerationem parata. Abſorbent inſimul pulveres, ex uſtis & calcinatis parati, uti v. gr. ſunt pulvis abſorb. Wedel. e chelis canceror. C. C. & ebur. uſt. conch. calcinat. unicorn. foſſil. Educunt & evacuant purgantia, ut pilulæ purgant. Dn. Præſid. Becheri, tartareæ Quercet. Wed. Schroeder. Bontii polychreſt. In infuſo, vel decocto, folia ſennæ, rhabarbar. mechoac. agaric. &c. cum cremor. tartari. In pulveris forma pulvis catholicus Michaelis, cerberus triceps, ſpec. diaſenn. rad. gila. lap. nigr. reſinos. rhabarbar. cum cryſtall. vel crem. tartar. 3.) *Maſſicatoria*, quatenus copioſam excretionem ſalivæ efficiunt, ut radix pyrethr. cubeb. maſſich. &c. 5.) *Diluentia, & temperantia*, ſerumque blandum inducentia. Talia ſunt decocta, uti decoct. hord. c.



C. C. & rad. scorzon. avenac. & composita ex radic. bardan. cichor. chin. fœnicul. gramin. glycyrrhiz. ononyd. polypod. parreir. brav. ninzig, sassaparill. scorzon. valerian. &c. Hb. agrim. beton. euphras. hep. nob. hed. terrestr. cost. meliss. scabios. veron. virg. aur. Fl. acac. scabios. &c. Lign. sassafr. sanct. Sem. anis. fœnic. Cort. citr. aurant. Serum lactis dulce. Infusa ex rad. helen. trifol. fibr. gentian. plantag. hb. scord. card. bened. chamadr. verben. tertianar. summit. cent. min. fumar. cuscut. lign. colubr. cort. chin. &c. In ophthalmia chronica, & recurren- te, etiam egregium præstant auxilium aquæ medicatæ minerales, acidulæ & thermæ.

## Th. XXII.

Scorbuto præsen- te, cum supra dictis medicamen- tis, in usum vocanda veniunt simul antiscorbutica dicta, ut Ess. cochlear. fumar. scord. serpentar. virginian. lumbricor. viperar. amar. Elix. p. p. antiscorbut. &c. martialia, antimoniatâ, immo mercurialia. Si lues venerea, vel morbus venereus, producit ophthalmiam, adhibenda sunt antivenerea, sanguinem purificantia, evacuantia, bezoardica, purgantia, balsamica & antiputredinosa. Purgantibus misceri solet mercurius dulcis, rite præparatus, debita quantitate; pulveribus absorbentibus, & bezoardicis, martialia, cinnabaris nativâ, vel antimonii, vel, horum loco, æthiops mineralis. Commendat hunc Dn. CARL de SAINT YVES, in Tract. de Morb. ocul. in ophthalmiis serosis, cum serophulis, pag. 194. Exhibet nempe per trium dierum spatium gr. XXX. & ita XC. quibus adhibitis, quarto die dat purgans, & ita pergit usque ad restitutionem. Si in variolis ophthalmia præsens est, proficua sunt remedia bezoardica media, & fixa, cinnabarina, temperantia, & balsamica. Inprimis au-



tem omni studio declinanda est palpebrarum oclusio, ne materia viscida stagnationem subeat. Ideo applicanda sunt, quæ docet B. WEDELIVS, in Tract. de Morbis infantum, pag. 145. *Pro oculis tutandis, vulgatum, sed Dioscorideum jam remedium, est crocus, cum lacte humano palpebris illitus; aperiendis vero oclusis, lac solum, vel ophtbalmicum etiam ex solo magisterio sacchari saturni, cum aqua rosarum, vel sine, vel cum aliis.* His cum linteaminibus duplicatis applicatis, humor viscidus resolvitur, & acrimonia temperatur. In affectibus catarrhalibus adhibentur anticatarrhalia, & pectoralia, succinata, myrrhata, Elix. pectoral. spirit. sal. ammoniac, anisat, vel fœniculat. Eff. lign. pulveres balsamic. bezoard. & temperant. decocta pectoralia ex rad. glycyrrhiz. cichor. fœnic. polypod. squill. ppt. hb. botryos Mexican. bellid. cost. pulmonar. scabios. veronic. fl. acac. bellid. scabios. sem. anis. fœnic. filiq. dulc. Si vomitus gravior induxit dictum malum, ille sistendus per aptemetica, carminativa, theriacalia, extract. theriacal. electuar. diascord. Fracast. Eff. anodyn. theriacal. aromat. Bals. Vic. G. E. aromat. liquor. anodyn. mineral. nec externe in regione ventriculi applicata balsama stomachica, emplastra, sacculi, ex plantis nervinis compositi, effectum denegabunt. Præsente erysipelate faciei, cum ophthalmia, illa non repellenda, sed internis bezoard. med. & fix. balsamicis, & solventibus tractanda. Vid. sub III. Dn. PRAESIDE a Dn. D. GIESLERO habitam Dissert. de *Repellentium usu damnofo*. Externe autem adhiberi debent pulveres ad erysipelas, ex amyl. sulph. lycopod. pulv. fl. sambuc. farin. fabar. lupin. orabi. ceruss. min. litharg. pomphol. croc. myrrh. & tantill. camph. suffitus ex G. anim. racamah. storac. calam. elem. oliban. thur. succin. fl. ros. lavend. &c. Oculis ipsis affectis, sacculi sicci, ex cephalicis plantis concinnati. In dysenteria bezoardica, balsamica theriacalia, & alia, in hoc malo proficua. Si a contagio ophthalmia orta, illud examinandum, & contra miasma conceptum curatio dirigenda. Dolori capitis, & vigiliis, nimis urgentibus, occurritur opiat, reliquis medicamentis parva dosi miscendis, non neglectis externis linimentis cephalicis, & epithematibus nervinis.

#### Th. XXIII.

Corpora, externe in oculis erosionem, & inflammationem præstantia, quantum fieri potest, cito sunt removenda. Hoc fit, si palpebris diductis, immittitur perla, vel semen quoddam vegetabile rotundum, politum & splendens, quæ efficiunt majorem lacrymarum effluxum, cum quo sæpe corpora peregrina auferuntur; vel si oculi bulbus subtili linteamine, aqua ophthalmica madefacto, abstergitur;



tur; vel si abluitur aqua simplici, vel ophthalmica. Quando autem dicta corpuscula firmiter inhzrent, follicula caute eximenda & extrahenda sunt. Vlnusculis dein applicanda collyria, & mucilagines.

## Th. XXIV.

Externe in usum vocanda, cum egregio emolumento, quæ resolvunt, discutiunt, & demulcent. Hujus commatis sunt 1) albumen ovi conqussatum, cum aqua rosarum, vel per se, vel, ex nonnullorum sententia, cum pauxillo aluminis, humor vitreus animalium, mucilago ex semine cydonior. plantag. psyllii, quæ cum aquis ophthalmicis contunduntur, mucilago exprimitur, tepesactaque, cum linteamine, applicatur. Hæc mucilago debet recens esse, non acida, aut corrupta, quod sæpe contingit, si majori copia paretur, quam ut intra spatium unius, vel duorum dierum consumi possit, aut non in loco frigido conservetur. Quæ etiam valent de collyriis. 2) Collyria ex aquis destillatis, prius filtratis, & ita ab oleo liberalis, ut chelidon. maj. calcatrip. euphras. sigill. Salom. solan. rosar. si. cyan. &c. His adduntur absorbentia, ut tut. ppt. pomphol. antimon. diaph. mater perl. resolvendi & mundificandi sine elix. p. p. sine acido, aloe, mel rosar. tantill. sacchar. saturn. vel magister. sacchar. saturn. Tale collyrium, secundum regulas præscriptionis formularum compositum, prius tepesactum, cum linteaminibus multiplicatis adhibetur. 3.) Demulcet & dolorem compescit, insimulque in tuberculis tunicæ adnatæ, & palpebrarum, suppurationem promovet cataplasma ex pomis dulc. sub cineribus coctis, & pulpæ, per setaceum trajectæ, addendo quid de saccharo saturni, croc. & camph. In ophthalmia spuria demulcendi & mundificandi sine commendantur unguenta, in cantho oculi majore illita, ut ungv. pomphol. & ophthalmicum MYNSICHTI, in *Armamentar. medic. chem.* pag. 487. communicatum, ut & pingvedo recens viperarum.

## Th. XXV.

Si contusio, vel vlnus prægressum, collyriis, vel mucilagibus applicatis superimponi debent sacculi ex plantis nervinis atque cephalicis, in vino cocti. In tota autem peripheria spiritum matricar. aquam Anhalcin. vel alium spiritum balsamicum adhibere conducit. Vlnus, palpebris infictum, emplastro siptico Crollii, vel alio hujus notæ, contrahendum, & consolidandum. Ita in ejusmodi casibus in praxi processimus, cum exoptato eventu. In ulceribus corneæ, & adnatæ remanentibus, Mr. DE SAINT YVES commendat solutionem Lapidis divini, quem descripsit in cit. Tract. pag. 192. Tubercu-



la, in palpebris, & tunicis externis, ab inflammatione induc̃ta, & relic̃ta, tractari debent mucilagine, vel cataplasmate ex pomis dulcibus, & si materia sponte non vult effluere, mediante acu, vel lanceola, apertio, & educ̃tio instituenda, alias materia mutatur in steatomata, & efformat tumorem tunicatum, quæ tunicæ nisi in curatione perfecte destruantur, materia de novo iterum ibi colligitur. Vlcuscula, finita operatione, collyriis mundificanda, & consolidanda. Ill. Dn. PRAESES aliquando, me assistente, tres ejusmodi tumores, sive grandines, in palpebris aperuit, ex quibus diversa educebatur materia; ex uno purulenta; ex altero glutinosa pellucida, viridi colore tincta; ex tertia steatomatica. Omnes vero felicissime sunt curati. Quod si autem inflammatio gravissima internarum oculi partium facta, & suppuratio subsecuta sit, materia autem effluere non possit, oculus protuberet, & gangræna ipsa præsens observetur, extirpationem & excisionem totius oculi bulbi necessariam esse, docet Mr. DE SAINT YVES, Cap. XX. Tali enim modo vehementia symptomatum infringitur, & aeger ex mortis faucibus eripitur. Citatus auctor, pag. 145. ejusmodi operationis institutæ exemplum profert, & felicissimam curationem factam esse, affirmat. Si vascula debilia sunt, robur illis conciliatur tum internis roborantibus, tum externis spirituosiss, & nervinis, uti sunt Balsam. vit. Ill. Dn. Præf. & Hoffmann, palpebris modo applicata.

## Th. XXVI.

Vti in omni curatione morborum, ita & in hujus diætæ probe est observanda. Aer eligendus est temperatus, purus, liberque ab effluviis acrioribus, nocivisque fumis. Vitanda sunt omnia alimenta acria, & viscida, & potu nimis spirituosio, abstinendum, & hujus loco, bibenda decocta laudata. Somnus conducit, & ut accedat deligatio oculi necessaria est, ne a radiorum lucis agitatione instituta dolor augeatur. Quies omni modo s̃vadenda. Animi pathemata declinanda. Excretiones solennes rite conservandæ. Alvus obstructa referanda, & insensibilis perspiratio impedita, libera reddenda.

Iam ad finem perducta tractatione de ophthalmia, devotissimæ DEO T. O. M. perago gratias, quod & huic labori clementi sua gratia adesse voluerit, faxit ille, ut in posterum omnes mei conatus & labores in divini ipsius nominis gloriam, & proximi commodum vergant. Si vero, B. L. non omnia, desiderio satisfaciencia, invenies, voluntatem pro facto amplecteris, mihiq̃ue veniam dabis benignam.

S. D. G.

In Præfat. pag. 4. l. 17. leg. speciminis.